

- 190 *dá sehent in die liute noch alle,  
und ist getân rehte in der wîse  
als in diu nunne úz der rîse  
mit iren handen enbant,  
dô sin vleisch und blutec vant.*
- 195 *Sus hát er sich sunder twâl  
gewandelt ze dem vunften mál,  
als ist er hiute noch getân.  
daz sehent wîp unde man,  
swer kumt ze sîner hôhzît,*
- 200 *die ein hábest machte sît  
der der vierde Urbánus hiez:  
grózen antláz er dô liez.  
in eim konzilje daz geschah,  
dá manec man den andern sah*
- 205 *ze Róme, sô hörte ich es jehen.  
swer in noch hiute welle sehen,  
der var gen Münster an dem donrstage  
nách der phingestwochen mit rechter sage,  
sô hevet sich sîn hôhzît*
- 210 *und wert gar án allen strît  
die wochen durch und durch hin.  
diu vrouwe wart ein klôsnerin,  
der ez geschah, und nam guot ende.  
der priester vuor án alle wende*
- 215 *in einen Walt, dá wolte er sîn,  
und búwet dá ein kirchelîn  
in êre Unser Vroun, der reinen maget.  
der priester vaste, sô man saget,  
brôt und wazzer manegen tac,*
- 220 *daz er niht anderr spîse phlac,  
unz er sît von brædekeit  
niht mê mohte. daz wart geseit  
geistlichen liuten, die in hiezen  
aller slahte spîse niezen.*

202 da liez. 205 es fehlt. 208. 211 woche. 215 wolt aus  
solt gebessert. 218 vastet. 220 anderre. 221 Hintz er.